

quam e converso, ut aliquod syncategorema detrahatur vel addat etc.: quam indifferentiam determinat voluntas præventa regulis.»

Conclusio etiam aliquo modo pendere potest a voluntate, saltem ut directa sit vel indirecta. «Nec ut imperetur, debet prænoscij judicativa, sed apprehensiva; ex quo non sequitur quod præexistat ante imperium. Immo, etsi prorsus necessario resulet conclusio ex præmissis, cum tamen haec pendant a voluntate, conclusio evadet voluntaria mediate et in causa, quod sufficit ad rationem præxoe. Sic sanitas est praxis Medicinae, licet applicata virtute medicamentorum necessario resulet. Conclusio tamen, ut hoc obiter notem, praxis est respectu regularum Logice, non respectu præmissarum; haec quippe movent, sed non dirigunt ad conclusionem formalem, cum non illam, sed ejus objectum, implice cognoscant. (1)

Cæterum argumentum allatum saltem non prodest Thomistis et Scotistis, adversariis nostris, quippe qui agnoscent directionem Logice simpliciter necessariam, aut certe valde utiliem, ad demonstrandum.

Objic. 6.^a Logica procedit modo resolutorio per definitiones, divisiones ac demonstrationes. Atqui procedere hoc modo est proprium scientie speculativae. Ergo...

Resp. dist. Minor. Est solius scientie speculativae neg, et est proprium speculativae etiam practicae, conc.

Nam etiam Moralis v. g. et Medicina, que scientiae practice sunt, definiunt ac dividunt, demonstrantque per prima principia.

Objic. 7.^a Proprium est speculativae scientie, ut objectum universalis contempletur. Atqui universalis modo suum objectum contemplatur Logica. Ergo...

Resp. eodem modo. Si quando cognitiones objectorum in universalis vocantur speculative apud D. Thomam et alios, sermo est de speculativo improprio, quatenus contraponitur practico vulgari et experimentalis consistenti in cognitione singularium et nunc agibilium. De cetero nulla est ars, etiam mechanica, que regulas practicas universales non

(1) Llossada, loc. cit., n. 16.

tradt. Ipsa etiam dictamina practica morum universalia sunt, ut: *Vitium est fugiendum, Quod tibi fieri non vis, alteri ne feceris* (1). Vide S. Thomam exponentem cum Aristotele, quomodo ars contemplatur objectum universale, et quomodo per hoc distinguatur ab experimento (2).

Objic. 8.^a Objectum Logice non est aliiquid operabile. Ergo non est practica scientia.

Prob. antec. Nam objectum Logice est aliiquid cognitum et universale et secundæ intentionis. Atqui neque objectum in universalis, nec in statu cogniti aut secunda intentionis est aliiquid operabile. Ergo... (3)

Resp. neg. antec.

Ad probat. *dist. Minor.* Objectum in universalis etc. non est operabile formaliter et reduplicative. *conc.*, absolute et secundum id, quod subjicitur formæ universalitatis et per mentis abstractionem reperitur in statu cogniti et secunda intentionis, *neg.*

Cæterum si argumentum valeret, nulla dari posset scientia practica et ars, quippe que objectum contemplantur in universalis. Reversa Medicus considerat corpus ut sanabile in genere; et tamen non desinit respicere objectum operabile, licet neque curari corpus in genere, nec per medicinas in universalis. Ita ergo Logica potest esse scientia practica, quia intendit introducere in actus intellectus illud artificium, quod in genere considerat.

Dices. Artificium illud est ens rationis, quod nihil reapse est. Atqui nihil non est operabile. Ergo...

Resp. dato, quod sit ens rationis, de quo nunc non disputationem, illud est vere scibile, juxta adversarios; ergo et vere operabile aliquo modo potest esse. Præterea sicut nihil sit, suo modo est possibile, et Logica toto conatu curat illius positionem instar formæ artificiose, ut volunt Thomistæ, qui propterea cognitionem singularem entia rationis, vocant *quodammodo practicam et effectivam* instar ædificationis (4). Hoc

(1) Llossada, loc. cit. n. 24.

(2) Lib. 1.^a Metaph., lect. 1, paragr. g et h.

(3) Cfr. Joann. a S. Thom., loc. cit. *Iundam.*, a priori.

(4) Vide Colleg. S. Thomæ. Complut., q. 1, art. 2, paragr. 5, n. 123.

autem sufficit, ut Logica sit practica; sicut practica est institutio signorum ad placitum, licet eorum forma sit ens rationis apud Thomistas; et sicut practica esse potest cognitio dirigens ad puram omissionem liberam» (1).

Plura dabunt Lossada et auctores citati.

CAPUT II.

DE OBJECTO LOGICÆ.

Quæstio hæc est una ex implicatissimis in Logica, in qua vix quidpiam certo definiri potest. Itaque breviter illam tractabimus, relatis diversis Philosophorum sententiis, quid nobis verisimilius videatur, aperiendo. Revocandæ autem sunt in memoriam, quas alibi tradidimus, objecti notio et divisiones.

ARTICULUS I.

Utrum voces sint objectum proprium
directe ac per se consideratum
a Logica.

Veterum opinio
obsoleta,

337. Omissa opinione veterum jam obsoleta, dicentium voces esse objectum adæquatum Logicae, queritur, an saltem sint objectum partiale. Atque ita revera dicendum esse videbitur, si in memoriam revocentur ea, quæ disputat Aristoteles, et cum eo reliqui Philosophi, de nomine, verbo, oratione, de univocis et aquivocis, de suppositione etc. At quoniam multiplex est objectum, controversia praesens solum investigat objectum, quod dicunt plures *formale quod*, alii vero *materiale proprium*, illud nempe quod expresse attingitur ex propriis meritis; et in hoc sensu volumus scire, utrum voces, de quibus certa agit Logica, sint objectum, quod ipsa consideret directe, an vero propter aliud, ad quod dicat

status
questionis.

(1) Lossada, loc. cit., n. 26.

ordinem, *per se vel per accidens* et ratione alterius, et consequenter utrum primario et principaliter, an vero secundario dumtaxat minusque principaliter.

Cæterum voces in hac quæstione non considerantur entitative, secundum quod important sonum: quo sensu spectant ad aliam tractationem, unde M. Augustinus, vel quisquis fuerit Auctor libri *de Principiis Dialectica: Verbum*, inquit, *sonat, sed quod sonat, nihil ad Dialecticam* (1). Nec iterum considerantur voces secundum significacionem vel in se, vel qualicunque artificio præditam, nam Grammaticæ est redere vocum significaciones, earumque tractare artificium ac texturam aptam, ut oratio sit congrua, nulloque peccans vitio sermonis; et Rhetoricæ est docere artificium sermonis, prout est tropis ac figuris ornatus; Pœsia vero prout est metro ligatus. At in Logica voces accipiuntur secundum artificium aptum ad exprimendam veritatem, prout cernitur in definitione, divisione, argumentatione etc. (2)

In hoc sensu voces esse objectum Logicae proprium directe et per se consideratum, opinantur Complutenses (3), pluresque Thomiste et alii (4). Ita etiam ex Nostris Richardus Lynce (5) et fortasse etiam De Benedictis (6).

Contrarium vero tenent Nostri communius cum Eximio Doctore (7), Toleto (8), Conimbricensibus (9), Rubio (10), Bartholomæo Amici (11), Bernaldo Quiros (12), Arriaga (13),

Sententiae.

(1) S. August., *De Principiis Dialect.*, cap. 5.

(2) Cfr. Lossada, *Log.*, tract. 1, proem. disp. 2, cap. 1, n. 2; Tolet. *Dialect.*, quest. 1, *Prim. fundam.*; et Semery loc. mox citando.

(3) *Dialect.*, disp. 1, q. 3, n. 31.

(4) Apud Lossada, loc. cit. n. 3; et apud Richard. Lynce, *Philos. Scholast.*, lib. 2, tract. 1, cap. 1, n. 1.

(5) Loc. nup. cit.

(6) *Philos. perip.*, vol. 1, quest. proem. cap. 5, parag. 2.

(7) Disp. *Metaph.* 1, sect. 4, n. 27.

(8) *Dialect.*, q. 5, concl. 1.

(9) *Dialect.*, q. 5, proem. a. 2.

(10) *Log.*, quest. proem. n. 17.

(11) *Log.*, tract. 1, q. 5, dub. 2.

(12) *Curs. Philos.*, tract. 2, part. prim. de *Log.*, proem. disp. 9, sect. 3.

(13) *Curs. Philos. Log.*, disp. 2, sect. 3.

Hurtado (1), Rhodes (2), Semery (3), Lossada (4) aliique; et ex Scotistic Mastrius (5) et alii.

Eligitur.

et probatur
verior.

338. PROPOSITIO. Voces non sunt objectum directe et per se consideratum a Logica.

Prob. 1. Illud est objectum directe et per se consideratum a Logica, quod directe et ex instituto dirigit ipsa. Atqui voces non directe et instituto dirigit, sed solum ex consequenti, et ex quadam concomitantia. Ergo...

Minor probatur. Nam directe et ex instituto Logica dirigit conceptus. Atqui eo ipso, quod hos dirigit, directae quoque manent voces, quantum ultra Grammaticam opus est, siquidem artificium vocale obtinet ad normam artificii mentalis. «Unde, qui talen normam ex Logica didicit formare, et res ipsa format, eo ipso, quin Logicam denuo consulat, facilissime formabit consequenter artificium vocale, si voces conceptibus exprimendis aptas, et eam syntaxim Grammaticam in promptu suggerat, prout debet. Ideo ut passim dicimus, qui recte concipit, et vito loquitur, vel Grammaticam nescit, vel in prudentiam peccat ultra volens. Ergo voces non directe et ex instituto dirigit Logica. Quandoquidem nulla est ars, que directe et ex instituto dirigit illud, quod jam sufficienter ex regulis alio primario tendentibus regulatum adest, quantum indiget, et ejus artificium postulat (6).

Prob. 2. Artificium Logicum proprie est in operationibus mentis, non vero in vocibus. Ergo voces non sunt objectum directe ac per se a Logica consideratum.

Prob. antec. a) Auctoritate Aristotelis sic scribentis: *Demonstratio non in oratione, quae est extra, sed in oratione, quae est in mente, consistit, quandoquidem neque ratiocinatio in illa consistere videtur* (7).

(1) *Log.*, disp. 1, n. 22.

(2) *Philos. perip.*, lib. 1, disp. 1, q. 1, sect. 2, paragr. 1.

(3) *Trienn. Philos.*, vol. 1, disp. 1, q. 2, art. 3.

(4) Loc. cit. n. 3.

(5) *Log.*, quest. proem. art. 3, n. 33.

(6) Cf. Lossada, loc. cit., n. 8, ex Suarezio.

(7) Lib. 1.^a *Posterior.*, cap. 8.

3) Ratione. Nam voces non sunt, nisi signa internorum animi conceptuum; nec ob aliud necessaria sunt, nisi vel ut aliis nostra communicemus, vel ut aliorum nos quoque sensa cognoscamus. Sicut scripture vel alii signa necessaria forent ad eundem finem homini surdo. Ergo potest Logicæ artificium sine vocibus omnino constare, sicut potest res, que signo aliquo manifestatur, integra in se absque illo permanere.

Consequentialia etiam principalis argumenti patet: a) ex paritate scripture; nam neque scripture, neque scriptum artificium est objectum directe et per se consideratum a Logica, ut fatentur saltem plerique adversarii, et manifestum videtur. Atqui eadem ratio est pro vocibus, nam voces eodem modo se habent respectu internorum conceptuum, ac scripture, nihil enim amplius sunt nisi signa illorum. Ergo...

3) Logica illud respicit dumtaxat directe, quod spectat ad artificium logicum. Ergo si in vocibus non inest proprium logicum artificium, non contemplatur illas directe et ex instituto Logica.

Prob. 3. «Seclusis vocibus et habitis regulis præcise terminatis ad conceptus, Logica obtinet perfecte finem, ad quem est instituta. Ergo Logica ex instituto non agit de vocibus.»

Prob. antec. «Logica omnium confessione instituta est ad alias scientias acquirendas per actus artificiose compositos. Sed ad finem istum obtainendum perfecte esset instructus, qui Logicæ regulas præcise terminatas ad conceptus bene nosset, v. g. qui illas haberet cœlitus infusas.» Ergo...

Prob. Minor. «Nam scientiae perfecte acquiruntur per actus intellectus. Ergo qui regulas istorum actuum bene nosset, plene instructus esset ad scientias perfecte acquiriendas» (1).

Plura de his apud Lossada require.

339. Quæ cum ita sint, inferes voces Logica regulari non immediate in seipsis, sed mediate et in conceptibus præsuppositis, quatenus ex attentione ad regulas conceptuum vel ad conceptus ipsos juxta regulas factos, facilissime potest ope

Quonodo
regularentur voces
a Logica.

(1) Lossada, loc. cit. n. 11.

Grammatice construi vocalis definitio, syllogismus etc.: et hoc est regulari voces indirecte ex consequenti ex quadam concomitantia, ut ait (1) Eximius (2).

Regulae
 Summularum
 circa voces
 instituuntur
 non ex exigentia
 Logice,
 sed ex
 indigentia logici.

Inferes præterea, «Summularum regulas circa voces non institui ex exigentia Logice, sed ex indigentia vel commoditate Logici. Nam Logica non indiget regulis artifici vocalis, ut finem suum perfecte obtineat...; nec aliunde, ut acquiratur ipsa, cum possit acquiri simpliciter inventione propria, ut ab Aristotele acquista est magna ex parte, vel etiam per regulas voce magistri expressas, quæ non de vocibus, sed de solis conceptibus loquantur,» vel etiam per scripturam. «Præterquam quod media, quæ tantum ex imbecillitate mentis humanae requiruntur ad acquirendam scientiam, non ideo præcise debent esse ejusdem scientie proprium objectum... Solum ergo prædictæ regule institute sunt ex indigentia et commoditate studentium, qui multo commodus faciliusque percipiunt regulas vere logicas artifici mentalis, si prius exerceantur in artificio vocali, et ejus regulas addiscant.» Nonnulla etiam disputantur, ut errores ventur, qui per abusum vocum irreperere possunt in scientiis ex defectu attentionis vel rectæ applicationis præceptorum: quo spectant illa, quæ tractantur de terminis æquivocis, amphiboliis etc. «Hæ autem tyronum tarditas vel commoditas per accidens est respectu Logice: quare voces appellari solent ab auctoriis nostris sententiae objectum Logice per accidens: certe vocari debent objectum non *formale*, non *directe* et per se consideratum, sed *indirecte*, *reductive*, et ex consequenti regulum» (3).

SOLVUNTUR DIFFICULTATES.

340. Objic. 1.^o Hæc habet S. Thomas quæ expresse nostræ sententiae contradicunt: *Sed quia Logica ordinatur ad cognitionem de rebus sumendam; significatio vocum, quæ est immediata ipsiis conceptibus intellectus, pertinet ad principalem considerationem ipsius* (4).

(1) Disp. 1, Met., sect. 4, n. 27.

(2) Lossada, loc. cit. n. 12.

(3) Lossada, loc. cit. n. 14.

(4) S. Thom., *Periherm.*, lib. 1, lect. 2, paulo post init.

Ita Complutenses (1).

Resp. S. Thomas loquitur in primis de significatione vocum, quæ spectat ad considerationem Logicæ, non vero de tractatione vocum. Deinde, ut colligitur ex contextu, S. Doctor comparat voces cum scriptura: unde videtur innuere illarum significationem principalius spectare ad Logicæ considerationem, quam significatio litterarum, quæ quia est magis remota conceptionibus intellectus, non pertinet ad ejus considerationem, sed magis ad considerationem Grammatici. Lege S. Doctorem (2).

Objic. 2.^o Logica directe et ex professo tractat de vocibus. Sane Libri *Peribermenias* seu *de Interpretatione*, qui vere sunt Logici, directe de vocibus agunt, earumque proprietates demonstrant. Ibi de verbo, de nomine, de oratione sermo est; et oratio vocalis enuntiativa praesentis esse contemplationis dicitur ab Aristotele (3). Adde, quod terminus logicus dividitur in mentalem et oralem (4).

Resp. neg. assertum. Ad probationem vero dicendum est libros *Peribermenias*, non agere de vocibus tamquam de objecto proprio, sed tamquam de signis conceptuum, per quæ melius intelligantur regule circa illos. Unde libri illi quatenus talia tractant non videntur propriæ logici, sed solum indirecte et reductive, nec scripti a Philosopho tamquam de proprio Logico objecto. «Quia enim objectum Logice, ut pote in mente latens, videbat Aristoteles haud facile perceptum iri a tyronibus in semetipso, nisi prius spectaretur in signo exteriori et sensibili, idcirco discentium commodo consules, libros *Peribermenias* eorumque regulas scripsit expresse terminatas ad artificium vocale, tamquam ad signum et exemplar externum intellectualis» (5).

Diviso vero illa termini Logici in mentalem et oralem univoca non est, sed analogia, siquidem terminus logicus proprie mentalis est, ut constat ex dictis (6).

(1) Loc. cit., n. 31.

(2) Cfr. Lossada, paulo alter respondens, loc. cit., n. 18.

(3) *Periherm.*, lib. 1, cap. 4.

(4) Lossada ibid., n. 19.

(5) Lossada, loc. cit., n. 16; vide plura, n. 17, 18. Cfr. ib. n. 9, 10.

(6) Cfr. Lossada, ib. n. 20.

Objic. 3.^o In vocibus vere inest artificium logicum. Ergo et ratio objecti vere logici.

Prob. antec. exemplo definitionis, nam hoc vocale complexum *animal rationale* est vere et proprie oratio explicans essentiam rei. Ergo vere continet artificium definitionis.

Præterea illud complexum in primis est oratio, siquidem hæc est *vox significata ad placitum* etc. Deinde explicat essentiam rei, quia signum revera manifestat objectum suum⁽¹⁾.

Resp. neg. antec. et ad probation. *dist.* antec. Est oratio explicans essentiam rei grammaticice, *conc.*, logice, *neg.*

Ad aliam probationem. «Definitio orationis, ut jacet in Summulis, non est propria Logicæ, sed Grammaticæ, prout hæc inserta est Logicæ tyronum gratia, vel prout a Logica indirecta regulatur, ut constat ex dictis. Neque item pure logica est ea definitio, dum traditur per signum præcisum a formali et instrumentalí. Debet ergo, ut sensum pure logicum reddat, supponere signum suo interno et formalí, quod est proprium Modi sciendi...⁽²⁾

Objic. 4.^o Ars statuarie directe respicit suum artificium in quamcum materia inveniatur, sive in marmore, sive in jaspide etc. Ergo et Logica suum directe respiciet, sive in voce sive in conceptu reperiatur⁽³⁾.

Resp. neg. paritatem. Quia artificium statuarie vere et proprie salvatur in quovis genere lapidum; et artificium logicum translatum ad voces non formaliter manifestat ignotum, prout Logica intendit, adeoque deficit a proprietate logici artificii⁽⁴⁾.

Objic. 5. Logica non solum docet scire, sed etiam *docet docere et docet discere* ex S. Augustino⁽⁵⁾. Sed per artefacta vocalia docemus et discimus, licet per sola mentalia sciamus. Ergo⁽⁶⁾.

Resp. «Docere et discere, quatenus hæc vocibus fiunt, docet Logica indirecta tantum, quia dum regulas ad conce-

(1) Apud Lossada, loc. cit., n. 21.

(2) Lossad., ib. n. 22, ubi plura.

(3) Apud Lossad., loc. cit. n. 21.

(4) Lossada, n. 23. Cfr. ib. n. 5.

(5) Lib. 2, de *Ordin.*, cap. 13.

(6) Apud. Lossad., loc. cit. n. 21.

plus dirigit, facile inde colligunt Logici, qua methodo et forma verborum uti debent in disciplinis tradendis atque descendis»⁽¹⁾.

Plura dabunt Lossada, Semery et alii AA.

ARTICULUS II.

**An res spectatae secundum suam entitatem
sint objectum Logicæ.**

341. Res bifariam considerari possunt: secundum sua prædicta realia independenter in se ab hoc, quod a nobis cognoscantur; et prout a nobis certo modo cognite. Questio ergo proposita versatur circa res primo sensu consideratas; eaque respicit objectum *formale quod*, vel illud, quod per se ac directe consideretur a Logica, quemadmodum notatum est in questione præcedenti.

Communiter sentiunt Philosophi res secundum suam physicam entitatem non esse *adequatum ac totale* Logicæ objectum, siquidem Logica de aliis etiam agit. Sed dubitatur utrum res sint saltem *partiale* objectum Logicæ. Affirmant quidam, inter quos numerandus est P. Richardus Lynce⁽²⁾. At vero communissima in omni schola sententia negat.

342. PROPOSITIO 1.^a Res secundum suum esse vel entitatem naturalem non sunt objectum formale directe ac per se consideratum a Logica.

Ita inter alios Toletus⁽³⁾, Rhodes⁽⁴⁾, Quiros⁽⁵⁾, Arriaga⁽⁶⁾, De Benedictis⁽⁷⁾, Semery⁽⁸⁾, et Lossada⁽⁹⁾ cum Suarezio⁽¹⁰⁾.

Status
questionis.

(1) Lossada, ib. n. 23.

(2) *Phil. Schol.*, lib. 2, proem. *Dialect.* tract. 1, cap. 4.

(3) *Dialect.*, q. 5, concl. 5.⁴

(4) *Philos. perip.*, lib. 1, disp. 1, quest. 1, sect. 2, paragr. 1.^o

(5) *Curs. Philos.*, tract. 2, pars prim. *de Log. proœm.*, disp. 9, sect. 4.

(6) *Log.*, disp. 2, sect. 1.

(7) *Philos. perip.*, vol. 1, quest. proœm., cap. 5, paragr. 2, *Dico 1.^o*.

(8) *Trienn. philos.*, disp. 1, q. 2, art. 5.

(9) *Log.*, tract. 1, disp. 2, cap. 3.

(10) Disp. 1 *Metaph.*, sect. 4, n. 27, seqq.

non sunt ob-
jectum Logicae
formale;

Prob. 1. Auctoritate S. Thomae: *Philosophia prima, inquit, est de communibus, quia ejus consideratio est circa ipsas res communes, scilicet circa ens et partes ejus. Et quia circa omnia, que sunt, habet negotiari ratio, Logica autem est de operationibus rationis, Logica etiam erit de his, que communia sunt omnibus, id est, de intentionibus rationis, que ad omnes res se habent. Non autem ita, quod ipsa Logica sit de ipsis rebus communibus, sicut de subjectis* (1).

Prob. 2. Logica, utpote quæ ars directiva est, illud habet pro objecto suo proprio, in quo inducere debet formam rectitudinis pér suas regulas. Atqui rectitudinem illam non inducit profecto in res ipsas, secundum suam naturam spectatas. Ergo...

In idem recedit hæc alia probatio. Logica est scientia practica, aut certe instar practicae. Ergo habet pro objecto id, quod ab ipsa operabile est, et prout operabile. Atqui res ipsæ non sunt operabiles a Logica secundum earum naturalem entitatem. Ergo...

Prob. 3. Si res forent objectum proprium Logicæ, ad eam spectaret agere de rebus omnibus. Atqui hoc falsum est. Primo, quia secus nemo esset bonus Logicus, nisi omnia nosset. Deinde Logica non esset una scientia a cæteris distincta, sed complexus omnium scientiarum.

Dices ad Logicam quidem spectare agere de omnibus, at parce, sobrie ac per summa capita; cæterarum vero scientiarum esse, ut res pertincent funditus et copiosius.

Resp. Si ad Logicam revera spectat naturas rerum investigare tamquam objectum proprium, non est, cur non possit, ac debeat jure suo de illis funditus et copiosius agere. Tum quia quavis scientia potest ac debet id facere respectu sui objecti proprii, ut constat inductione; tum quia rationes, ob quas adversarii parcam sobriamque rerum omniam tractationem Logicæ attribuunt, aquæ vindicant tractationem copiosam. Has namque afferunt illi rationes; primo quod notitia rerum omnium sit necessaria, ut intellectus vitem errores, quo tandem tendit Logica; deinde quod ea notitia

(1) S. Th. lib. 1.^a *Poster.*, lect. 20, paragr. d. Cfr. Opusc. 1.^{us} *de Universalibus*.

sit utilis ad expedite definitendum, dividendum et argumentandum. Atqui Logica multo magis cavebit errores, si penitorem rerum habeat notitiam, quam si solum eas norit in communi, itemque expeditior profecto erit ad ratiocinandum de rebus, v. g. de Deo, de homine etc., si has substantias in particuliari pertractet, quam si solum substantiam in generi. Ergo (1).

Logica itaque docet errores cavere, et expeditum reddit ad definitendum, dividendum, argumentandum, non investigando naturas rerum, sed præcipiendo regulas modosque, quibus in quavis materia recta definitiones, divisiones argumentationesque fiunt. Sicut Oratoria leges præscribit, normasque generales proponit, secundum quas apposite ad persuadendum quis loquatur. Materiam vero loquendi aliis scientiis relinquit, vel ex iisdem mutuat, si quando exercitationes oratoriae in scholis habenda sunt.

343. PROPOSITIO 2.^a Res secundum esse physicum spectatae possunt dici objectum materiale saltem remotum vel mediatum, vel indirecte seu de obliquo attactum.

Nam illud dici potest objectum materiale remotum, mediatum, vel indirecte seu de obliquo attactum, quod saltem mediante alio, quod proximum objectum est, attingitur. Atqui tales sunt res per respectum ad Logicam.

Nam Logica agit de operationibus intellectus, quatenus recte ordinantur ad assecurationem veritatis. Atqui res sunt objectum harum operationum.

Item Logica agit de generibus, speciebus etc. Atqui genera et species sunt nature reales certo quodam modo cognitæ. Ergo...

Item indirecte et in obliquo sœpe attinguntur res, ut cum dicis: *Definitio est oratio essentiam rei explicans, quæ definitio, ad Logicæ objectum certe spectans attingit, saltem in obliquo, rem et essentiam* (2).

possunt tamen
dici
objectum
materiale.

(1) Cfr. Lossada, loc. cit., n. 4.

(2) Cfr. Lossada, loc. cit., n. 15; Ulloa, *Log. Minor.*, disp. 3, cap. 1.

SOLVUNTUR DIFFICULTATES.

344. Objic. 1.^o In tractatu de *Prædicamentis*, qui apud omnes veteres cursus reperitur, directe et formaliter agitur de rebus secundum esse reale ac physicum ipsarum, nempe de *substantia*, *quantitate*, *qualitate*, *relatione*, etc.

Resp. *dist.* antec. Et in hoc tractatu Logica directe et ex proprio instituto investigat naturas rerum, prout sunt in seipsis, *neg.*, investigat illas in ordine ad prædicationem, prout nempe ordinabiles sunt secundum subjectionem et prædicationem, *conc.*.

Et neg. conseq.

Sunt, qui tractatum de *prædicamentis* nullatenus esse logicum, sed metaphysicum contendant, ut videre est apud Toletum (1), Conimbricenses (2) et Lossada (3). Nihilominus concedi potest hoc etiam ad Logicam spectare, non tamen directe ac per se, sed in ordine ad prædicationes ac secundas intentiones, quæ per se pertinent ad Logicam. Ad rem Toleatus: «Hæc omnia metaphysica sunt. Logicus autem ex his decem naturis decem modos prædicandi desumit, fundatos in his decem modis entis, ad quos omnis modus prædicandi pertinet, et reliquos desumit secundarum intentionum respectus. Ut quemadmodum ex cognitione metaphysica rei naturalis cognoscimus, ita ex modis his prædicandi et aliis respectibus secundarum intentionum, primo unumquemque per se cognoscamus, et hinc postea singulas propositiones et questiones consequamur, an sit generis, an sit differentia et qualis, an accidentis hujus vel alterius; et possimus secundum varia prædicta cognitiones et cognoscendi modos definire, dividere, argumentari. At vero quia, ut superius dixi, non possumus hos modos cognoscere, quin aliqua facilis et confusa rei cognitio præmitteretur; optima ratione et consilio Aristoteles res ipsas proposuit, non sicut Metaphysicus earum inquirens naturam, sed supponens, ut varios modos prædicandi et cognoscendi super eas res fundatos

(1) *Dialect.* in proem. in lib. *Categoriarum*.

(2) In proem., in lib. *Categorias*.

(3) Loc. supra cit. n. 6.

eliceremus; quod ipse clare ostendit, dum definens per prædicationem præcipue et alis similibus rationis respectibus definitivit. Semper enim substantiam per prædicationem explicat; et qualitatem dicit esse, secundum quam quales esse dicimur. Unde alia ratione hæc Metaphysicus, alia Logicus considerat» (1).

Objic. 2.^o Logica intendit instructionem intellectus. Atqui ad hunc finem valde conducit non solum apparatus regulorum, sed expositiō etiam rerum ac distributio in varias classes, ut super his artificiose ratiocinetur intellectus. Ergo (2).

Resp. *dist.* Major. Logica intendit instructionem intellectus, mediis regulis ad ordinandos conceptus, *conc.*, media doctrina de rebus ipsis, *neg.*

Non negamus tamen utilē esse ad instructionem intentam a Logica aliquam dispositionem rerum, et propterea etiam Aristoteles res ipsas in prædicamentis aliquantulum declaravit. Sed non quidquid utile aut etiam necessarium est ad meliorem artis intelligentiam, debet ab ipsa directe ac per se considerari, sed potest etiam aliunde supponi, aut ex alia scientia desumi (3).

Objic. 3.^o Logica considerat veritatem conceptuum. Atqui hæc partialiter consistit in esse physico rerum, cui debet intellectus conformari, ut veritatem assequatur. Ergo (4).

Resp. Logica considerat veritatem formalem seu conformitatem conceptuum cum rebus, quatenus ab arte dirigibilem. Non est autem dirigibilis ea conformitas secundum omnia sua constitutiva, sed secundum quod importat in recto dumtaxat, nempe secundum conceptum. Non enim dirigit Logica, aut dictat v. g., quod leo sit animal; sed aliunde supposito, quod sit, dirigit, ut judicium huic objecto conforme potius, quam difforme elicatur. Sicut ars pictoria, que intendit imagines rerum exprimere, non dirigit, ut homo pro-

(1) Tolet., loc. cit.; Cfr. Conimbr., loc. cit.; Rub, *Breve proem.* in lib. *Categor.*; Sotus *In Prolegom. Prædicament.* concl. 3.^a; Suarez, disp. 1. *Metaph.*, sect. 4, n. 28 et 29.

(2) Apud Llossada, loc. cit., n. 8.

(3) Cfr. Llossada, ib. 9, 10.

(4) Apud Llossada, loc. cit., n. 8.

ductum nam in facie gestet; sed supposito, quod ita est, dirigit, ut hominis quoque imago sit nasuta (1).

Objec. 4.^a Juxta Aristotelem (2) et D. Thomam (3), Dialectica versatur circa omnia entia, deque rebus omnibus disputat.

Resp. *dist.* assert. Logica vere ac proprie talis eaque docens, de qua modo disputamus, neg., Dialectica seu Logica *topicā* et utens, *conc.* At usus praeceptorum topicorum et applicatio ad disputandum de omni re, est aliquid accessoriū ad Logicam (4).

Lege S. Thomam in locis citatis. Et plura vide, si lubet, apud Lossada (5) et apud Semery (6).

ARTICULUS III.

Utrum objectum formale Logicæ
sint res prout cognitæ, vel secundum esse
intentionale.

345. Exclusis vocibus ac rebus secundum esse physicum earum a ratione formalis objecti, videndum nunc est brevissime, quid dicendum sit de iisdem secundum quod cognitæ sunt. Illud enim quod cognoscitur, est aliquo modo, nempe intentionaler et secundum suam similitudinem idealem, in intellectu cognoscente, et in hoc sensu dicuntur habere esse intentionale. Res porro, prout cognitæ vel secundum esse intentionale, vocantur etiam conceptus objectivi, et constituent concretum quoddam logicum, coalescens ex realitate ipsa physica, que cognoscitur, tamquam ex materia vel subjecto, et ex actu cognitionis realis, tamquam ex forma. Quæritur ergo nunc, utrum conceptus objectivi, vel res

Declaratus
sensus
controversie.

(1) Lossada, *ibid.*, n. 11.

(2) Lib. 4 *Metaph.*, cap. 2.

(3) S. Th., lib. 4 *Metaph.*, lect. 4, paragr. b, et lib. 1 *Poster.*, lect. 20, paragr. l.

(4) Cfr. Lossada, loc. cit. n. 13; et disp. 1.^a cap. 2, n. 23 seqq.

(5) Loc. cit.

(6) Loc. cit., art. 6, 7.

secundum esse intentionale, vel secundæ intentiones objective in concreto, nam haec omnia idem significant, sint formale objectum Logicæ, saltem partiale.

Affirmant quidam (1), negant tamen communiter Autores nostri (2).

346. PROPOSITIO. Res secundum esse intentionale, seu secundæ intentiones objective in concreto, non sunt objectum formale Logicæ.

Prob. 1.^a Ut secundæ intentiones objective in concreto es-
sent objectum formale Logicæ, deberet haec respicere formaliter in illis v. g. in *genere*, aut in *specie*, praeter formam, ipsum subiectum seu materiam concreti illius. Atqui Logica non respicit formaliter subiectum illarum intentionum, v. g. *natura animalis*, in genere, vel *naturam hominis*, in specie. Ergo...

Prob. Minor. *Natura animalis* v. g. vel *natura hominis* non attingitur a Logica propter se. Ergo neque formaliter ab ea respicitur.

Consequientia bona est; antecedens vero probatur.

Ut a Logica attingeretur per se natura animalis vel hominis, deberet habere aliquam formalitatem, quæ sit motivum capax logicae considerationis. At nullam habet hujusmodi formalitatem. Quenam enim, quæ, illa est? Dicunt adversarii naturam animalis vel hominis habere intrinsecam capacitatem, ut artificiose cognoscatur, et hoc esse motivum, cur a Logica attingatur vel consideretur. Atqui capacitas hujusmodi non est sufficiens motivum. Primo, quia talis capacitas reperitur in omnibus et singulis formalitatibus rerum omnium possibilium, immo et impossibilium: quare Logica agendum foret de omnibus prorsus rebus ac formalitatibus illarum, id quod Logicam confunderet cum reliquis omnibus scientiis. Deinde capacitas illa est prædicatum transcendentis, necessarium, non facile, nec dirigibile, nec pendens ab ulla regulis artis. Atqui nequit esse hujusmodi objectum Logicæ, quippe quæ, fatentibus etiam adversariis, aut est scientia

Res secundum
esse intentionale
non sunt
objectum
formale Logicæ.

(1) Apud Lossada, *Logica*, tract. 1, disp. 2, cap. 6, n. 1.

(2) Apud Lossada, loc. nup. cit.

vere practica, aut certe practicæ similis in modo procedendi. Ergo... (1).

Dices: Licet Logica non respiciat naturam animalis vel hominis etc. seorsim, bene tamen ut convertitam forma cognitionis ita, ut uno ictu immediate feratur in cognitionem et rem cognitam, tamquam partes unius concreti.

Resp. Quamvis intellectus uno ictu totum attingat, si tamen ratio formalis et motiva attingendi non est ipsa entitas rerum, sed sola cognitione realiter ab illis distincta; ergo jam res ipsæ, ut summum, non sunt nisi objectum materiale proximum et intrinsecum. Non enim egreditur limites objecti materialis id, quod propter rationem formalem a se distinctam attingitur, ut patet in mysteriis Fidei v. g., quæ creduntur propter autoritatem Dei revelantibus; in charitate proximi, qui amatur propter Deum; in medicina, quæ sumitur propter amorem salutis etc.

Præterea cum dicunt adversarii rem cognitam respicunt prout est pars concreti, vel reduplicant aliquid extrinsecum rei entitatis, nempe tendentiam cognitionis, vel solum aliquid intrinsecum, nempe intrinsecam aptitudinem, ut artificiose cognoscatur. Si primum eligant, entitas rei non est nisi materiale objectum, ut nuper dicebamus; sin alterum, valeat argumentum factum.

«Eodem dilemmate urgebis adversarios, quoties dicunt res physicas a Logica non considerari secundum se, sed cum respectu ad cognitionem, sive ut objicibiles, ut definibiles, ut enuntiabilis» etc., quemadmodum loquitur Quiros (2). «Nam respectus ille, illa objicibilitas, aut definibilitas, quam proponunt pro motivo considerationis logicæ, vel est quid intrinsecum rebus ipsis, vel est quid extrinsecum, in cognitione possibile aut existente consistens. Et quidquid optent, impugnatio redit» (3).

Prob. 2.^o «Ars pingendi, licet respiciat hominem ut pictum, illum unice respicit propter picturam sive imaginem;

nec in hoc concreto homo pictus, aliud pro formalis respicit nisi formam. Ergo pariter Logica, dum res considerat, ut artificiose cognitas.... Huc etiam faciunt exempla Rhetoricae et Grammatica. Pari nempe jure Grammatica diei posset formaliter considerare res significatas vel significabiles, quo Logica res definitas vel definibiles. Ut enim Logica est ars definendi, sic Grammatica est ars emendate loquendi de omnibus rebus. Nihilominus Grammatica solam respicit formaliter locutionem ut congruam» (1).

Et hanc videtur expresse sententiam S. Thomas, vej quicunque sit auctor Opusculi secundi de *Universalibus*: *Impossibile est unam et eamdem scientiam determinare de Universalis per se quantum ad illas duas naturas, quas includit; sed potius de uno per se, et de aliis per accidens*. Ergo Logica, cum considerat universale, non considerat ipsum quantum ad naturam subjectam per se; non enim considerat hominem, in eo quod homo, sed in eo quod species, et sic de aliis animalibus. Et ideo Logica principaliter est de secundis intentionibus... Aliæ autem scientie considerant universale quantum ad rem subjectam; nam Philosopbus naturalis non considerat corpus mobile in quantum genus, sed in quantum mobile corpus; et musica non considerat sonum in quantum accidentis, sed in quantum sic (2).

SOLVUNTUR DIFFICULTATES.

347. Objic. 1.^o Id est formale objectum partiale Logicæ, de quo verificantur aliqui actus Logicæ. Sed actus Logicæ non pauci verificantur de solis conceptibus objectivis, seu de objectis cognitione investitis. Ergo...

Prob. Min. Actus isti: *Genus est praedicabile de multis specie differentibus: Prædicatum propositionis affirmantis debet identificari cum subiecto; Definitio debet converti cum definito; In syllogismo extrema debent identificari cum medio, et similes alii logici sunt; et tamen de solis objectis cognitioni substantibus verificantur, ut consideranti patebit. Hinc tota fere*

(1) Lossada, loc. cit., n. 3.

(2) Curs. *Philos.*, tract. 2, pars. 1.^a de *Log. proœm.*, disp. 9, sect. 4, n. 44, seqq.

(3) Lossada, loc. cit., n. 4 et 5.

(1) Lossada, loc. cit., n. 6.
(2) Inter opp. S. Th., *Opusc.* 56, editionis Romanae jussu S. Pi^{II} V factæ.

Logica non tam est de actibus intellectus in semetipsis, quam de secundis intentionibus in concreto, seu de rebus ut a cognitione denominatis: tota siquidem est in explicandis generi, specie, differentia, subjecto, predicato, medio, extremis etc., quae nomina proprie convenienti conceptibus objectivis, nec nisi improprie aptantur formalibus (1).

Resp. 1.^o Hoc argumentum non «fayet conceptibus objectivis secundæ intentionis, id est, concretis, aut denominationibus constitutis ex objecto et cognitione directa; neque enim denominatio generis est prædicabilis de inferioribus, nec denominatio subjecti identificatur cum denominazione prædicati, est sic de cæteris. Actus igitur illi verificantur de solo objecto extra animam specificative sumpto, connata ut summum forma rationis ut mera conditione. Immo secundus et quartus, ut sonant, respiciunt rem prorsus independentem a forma rationis, nempe realem identitatem. Si ergo munus objecti formalis est verificare actus, plures erunt actus vere logici, qui solas res secundum esse physicum de formalib[us] respiciant ita, ut forma rationis ut summum sit conditio objectiva, quod tamen Auctores, quibuscum modo certamus, improbare videntur» (2).

Resp. 2.^o Negari potest Major objecti argumenti, «Non enim semper quod verificat actum est illius objectum formale, quoties nimur attingitur ob motivum seu rationem formalem realiter ab ipso distinctam. Sic, dum fide divina vel humana assentimur objectis alias ignotis, assensus isti verificantur de rebus creditis, cum tamen sola dicentis auctoritas sit eorum objectum formale» (3).

Resp. 3.^o dist. Minor. Actus Logicæ non pauci verificantur de solis conceptibus objectivis, si accipiuntur ut sonant, conc., si explicitur ad intentionem Logicæ, neg.; et neg. conseq.

Ad probationem, «Actus illi, si ad intentionem Logicæ explicitur, reddunt sensum hujusmodi: *Concepsus genericus talis esse debet, ut reddat naturam prædicabilem; Definitio et*

definitorum formalia verificare debent de eodem subjecto; Subjectum et Prædictum formalia representare debent objecta realiter identificata; In syllogismo exprimi debet identitas realis extreborum cum tertio et inter se. Idem puta de cæteris. Sic autem explicati, proprie verificantur abs dubio de conceptibus formalibus, eosque directe respiciunt.»

«In idem recedit, quod alii dicunt, prædictos Logicæ actus, ut jacent, verificari de conceptibus formalibus, non ut *quod*, sed *ut quo*, non *in essendo*, sed *in representando*: quamvis enim subjectum et prædictum formalia non sint *id*, quod identificatur, tamen representant objecta realiter identificata: et quamvis conceptus *animal* non sit, *quod prædicatur*, est *id*, *quo redditur objectum prædicabile*» (1).

Objic. 2.^o Concreta genus, subjectum, prædictum et similia, ad aliquam scientiam pertinent secundum omnes partes, quas involvunt. Sed non ad aliam, quam ad Logicam. Ergo... (2)

Resp. 1.^o Non omne concretum seu denominatio extrinseca adscribi debet alicui scientiae, ut patet in his: *amatum, visum, tactum, irrisum...*

Resp. 2.^o «Ut ea concreta spectent ad Logicam, non debet utraque pars habere munus objecti formalis, sed sufficit, quod altera formaliter, altera materialiter, per actus logicos attingatur, ut accidit his concretis: *congrue significatum, ornate dictum, graphice expressum, comparatione Grammaticæ, Rhetorice et Pictoriæ*» (3).

Dices: Physica non solum formam, sed etiam materiam habet pro formalib[us] objecto.

Resp. neg. paritatem. Ratio enim, cur Philosophia naturalis et materiam et formam directe ac per se considerat, est quia utraque participat rationem entis mobilis, que est ratio formalis, sub qua tendit illa scientia.

Objic. 3.^o Tractatus de *Anima* non solum agit de actibus intellectus et voluntatis aut sensuum, sed etiam de objectis eorum. Ergo idem dicendum est de Logica.

(1) Apud Lossada, loc. cit. n. 10, apud quem vide solutas in n. 11, 21, instantias contra hanc solutionem factas.

(2) Apud. Lossad., ib. n. 13.

(3) Lossad., ib. n. 13.

(1) Apud Lossada, loc. cit. n. 7.

(2) Lossada, loc. cit. n. 8.

(3) Lossada, ib. n. 9.